

---


This is a reproduction of a library book that was digitized by Google as part of an ongoing effort to preserve the information in books and make it universally accessible.

Google<sup>TM</sup> books

<https://books.google.com>



\*35. E. 272



MENTEM ALIT ET EXCOLIT



K.K. HOFBIBLIOTHEK  
ÖSTERR. NATIONALBIBLIOTHEK

---

\*35.E.272





# ORATIO

## IN INTRODVCTIONE AC INSTAL latione Reuerendissimi, ac amplissimi Do mini, D. VVolffgangi Gyuulay, Epi scopi almæ Ecclesiæ Zagrabiens sis dignissimi.

*Ibidem in templo Cathedrali, per Reuerendiss. ac eximium D.  
Paulum D. D. Lectorem, Canonicum ac Vicarium  
eiusdem Ecclesiæ Zagrabiens. &c. in maxima do  
ctissimorum uirorum, ac Optimatum Regni  
Sclauoniæ corona, populiq; frequentia  
habita. An. salutis nostræ 1549.  
Die 24. Februarij.*



Georgij Petrovvinay Submontani  
Hexasticon.

*Qui cupis eximij Lector pernoscere munus  
Pastoris sacrum, pagina lecta dabit.  
Contemplare lubens uenerandi Presulis acta,  
Et mores dignos posteritate legi.  
Hunc canit Orator præcellens diuite lingua  
Paulus, cum studijs tum pietate ualens.*

*Vienne Austria Ioannes Carbo & Egidius  
Aquila excudebant, Anno  
1549.*



# ORATIO.

—

**P**ostquam Diuine bonitati atq; clementie ita complacu-  
it, Reuerendiss. atq; ornatiss. Presul, ut tu, omnium  
uotis iam diu desideratus, hodierna die Cathedram  
Episcopalem huius Ecclesie dignè & meritò conscen-  
deris, uniuersa hæc Zagrabien. Ecclesia cum suo Clero,  
gratias imprimis immortales agit Deo optimo maximo,  
patri nostro celesti, qui in hac etiam rerum omnium ex-  
trema calamitate locum hunc non omnino despexerit, sed pastorem ei mi-  
serit talem, qui in doctrina, & uita uerè christiana edificare Ecclesiam  
esset idoneus. Te uerò optime Antistes, primam hanc tue uocationis pro-  
uinciam ingredientem summa animi alacritate, letitia, & gratulatione ex-  
cipit, tuumq; ingressum modis omnibus faustum precatur & foelicem,  
congratulaturq; tibi ex animo, de tam prospero rerum omnium successu, quo  
te nil tale meditantem, sed sua sorte contentum, & quasi inuitum, diuina  
dispositio ad supremum huius patrie dignitatis gradum euexit: Sibi  
uerò ipsi usq; adeo uniuersa congaudet Ecclesia, ut si unquam dies aliqua  
eidem fausta foelixq;, & albo signanda lapillo illuxerit, hanc profectò  
hodiernam foelicissimam sibi atq; faustissimam, & aureo signandam la-  
pillo aduenisse proficitur. De te enim multis argumentis, nil aliud, nisi  
quod de uero Episcopo sibi potest polliceri. Natus es nobili, eademq; ge-  
nerosa, & inclyta prosapia, iam à puero nobilissimis ad omnem pietatem,  
& uirtutem, doctrinis institutus; non te luxui, non inertie, non intempe-  
stiu conuiujs aut potationibus, non aleæ, non deniq; alijs huiusmodi uo-  
luptatibus & illecebris dedisti corrumpendum: Sed ut primum ex Ephes-  
bis, ut ille ait, atq; ex his studijs, quibus illa ætas ad humanitatem infors-  
mari solet, excessisti, mox generosi animi ductu ad maiora aspirans, in-  
celeberrima Patauina urbis Academia, ita liberalium artium studijs ani-  
mum tuum excoluisti, ut iam tum omnes æquales tuos, sicut scientiarum  
gloria, ita etiam candida animi dexteritate, erudita pietate, incomparabi-



li modestia et fortitudine, plurimum antecellueris. Religionem deinde spiri-  
 ritu sancto suggerente amplexus, quantum in negotio Evangelico profe-  
 ceris, quàm solidis ueræ et diuinæ sapientiæ doctrinis animum tuum im-  
 bueris, mirari profectò potius ualeo, quàm eloqui; prout idipsum fate-  
 buntur tecum omnes, qui de sacris aliquando et diuinis rebus tecum uer-  
 ba fecerunt: Quibus demum honestissimis medijs factum existimamus, ut  
 dignitatem Sacerdotij longè maximam Deo opt. dispensante gloriosè meru-  
 eris. Multum igitur tibi debet, debebitq; perpetuò, uniuersa Gyuulayna  
 familia posteritas, quæ solo tuarum uirtutum ductu atq; patrocinio con-  
 secuta est, ut multorum mortalium præconijs in futuro euo offeratur atq;  
 celebretur: Tu illi sydus præfulgens, tu decor, et gloria non immeritò ap-  
 pellabere: Conscendisti enim, quo nemo unquam ex Gyuulayna domo con-  
 scendisse legitur. Multum etiam tibi debet natale illud tuum solum, quo  
 primum in lucem editus es, cui non secus ac septem illis Homericijs urbi-  
 bus, plurimum decoris de tua stirpe ac origine est. accessurum: Omnium  
 tamen plus se tibi debituram existimat hæc ipsa sponsa tua ecclesia Zagra-  
 biensis, quæ de te, ita nato, ita educato ac instructo, certissimè sibi per-  
 suasit, futurum te talem præsulem, cuius insigni uirtute, doctrina, probita-  
 te, locus quoq; iste non mediocrem sibi, etiam apud exteras nationes, lau-  
 dem aliquando sit conaliaturus. Pauca admodum mortales extra Afri-  
 cam nouerant Hipponem, nisi illi præsedisset magnus pater Augustinus:  
 Exigua certè esset extra Gallias Thuronis mentio, nisi incomparabilis uiri  
 Diui Martini nomine foret illustrata: Nobilissima quoq; Mediolanensium  
 ciuitas dubio procul obscurioris longè esset nominis, si præsulis sui Am-  
 brosij, non esset decorata præconijs. Multum nominis addidit, sicut uni-  
 uersæ Pannoniæ, ita etiam ciuitati Quinq; Ecclesiæ. insignis illa doctrina  
 et eruditio Iani Pannonij Præsulis: Ille etenim est Ianus, patrium qui pri-  
 mus ad Istrum duxit laurigeras ex Helicone deas. Quis obsecro, ut in-  
 finita alia prætermittam, quis inquam in his oris, nosset celeberrimam Can-  
 tuariensium in Anglia ciuitatem, nisi illam decorasset inclyta sancti Tho-  
 mæ pietas atq; memoria? Ita faxit omnipotens Deus, ut tu quoq; inclyte  
 Præsul, locum hunc, quem diuinâ uocatione hodie conscendisti, tu præcel-  
 lenti uirtute, singulari doctrina, et eximia probitate, longè reddas clario-

rem. Id quod procul dubio fiet, si tu, ut certò credimus, Christi domini  
ueri pastoris uestigia imitatus, uerè curaueris esse, quod dixeris, & ueri Episcopi  
munus obire contenderis, reiectis illis uitijs, fastus, auaritiæ, ambitionis,  
emulationis, & alijs id genus, in quæ heu retroactis aliquot seculis, digni-  
tas hæc sacrosancta Episcopalis degenerauerat, ubi raro uel nunq̃ cognosce-  
batur, quid sit esse Christianum Episcopum, suffiabat quibuscunq; tandem  
artibus titulum consequi Episcopalem, cætera in ditandis familijs, congeren-  
dis opibus, promouendis adulatoribus, pompa, & elatione consumeban-  
tur. Veri Episcopi proprium munus est, quemadmodum tu ex sacris literis  
optime nosti, Vt sicut lucerna editiore loco posita, lucet omnibus, qui in do-  
mo sunt, ita prælatus officio & loco, uelut specula eminentiores, uitæ quoq;  
sanctimonia, uirtutæ, modestia, humilitate, patientia, & doctrina uerbi Dei  
omnibus, qui in Ecclesia sunt, debent præluce atq; prestare, unde &  
prælatus siue Antistes ob eam rem, apud Latinos diacepti, Et uetere græ-  
cò peculiaritèq; uocabulo, Episcopi, id est, consideratores, specularatores, &  
custodes appellantur: quoniam uigilem curam atq; considerationem in eo-  
rum salutem, quibus præfecti sunt, prestare debent. Quod ipsum, te opti-  
me Antistes, sedulo curaturum, & totis uiribus ad salutem tui gregis ad-  
mixturum, sicuti summo opere desideramus, ita etiam à Deo Patre nostro  
cœlesti deuotis precibus & firma fide, postulamus, persuasum habentes,  
& Patrem cœlestem pia suorum fidelium uota clementer exauditurum, &  
te quoq; tui officij atq; uocationis ita futurum memorem, ut expectationi de te  
conceptæ satisfacias. Ceterum, licet omnibus sis nobis uerè laudabilis, pos-  
semq; fortasse, etiam de singulis uirtutibus tuis panegyricos edere, quia ta-  
men didici eam tibi esse generosi animi modestiam, ut tuas laudes, nec a-  
gnosere, nec coram aliquo tibi uelis prædicari, proinde silentio te potius  
uenerabor, quàm multiloquio. Hoc saltem cum uniuerso hoc Clero, & po-  
pulo, summis uotis desidero, ut supremus ille omnium rerum modera-  
tor Deus, qui te hodie in locum hunc præcellentem sublimauit, præ-  
seruet etiam te nobis, & uniuersæ Reip. Christianæ, quàm  
diutissimè incolumè, ac fœliatissimis semper incremẽ-  
tis, in maius prouehat. In quo & sese tibi de-  
uotissime commendamus.

# CVM DOCTRINA TVM VIRTUTE PRAESTAN-

TISSIMO VIRO, MAGISTRO IOANNI KRANTZYTZ

Capituli almae Ecclesiae Zagrabiensis. Ludimoderatori, &c.

Georgius Petrouuynay Submontanus Salutem

& sui commendationem.

**G**ratè mihi fuerunt Literae tuae, uir ornatiss. gratior communis nostri Mecenatis, quam ad nos dedisti Oratio, habita in tam celebri doctiss. uirorum corona, quae profectò, dum eam legerem, incredibili uoluptate me adfecit. Dii boni quantus in ea lepòs, quantus ornatu, quàm succincta dispositio? Habeant Athenae suum Demosthenem, Glorietur Roma studiorum alitrix facundissimo Cicerone, uiro in eloquentia tanto, quantam posuit uel Romani Imperij magnitudo unquam complecti, Zagrabia certè inclita Sclauoniae metropolis, eximio D. Paulo D. D. uiro me herclè omnibus uerè sapientiae dotibus cumulatissimo, non solū gloriari, uerū etiam ad sydera se extollere iure & potest & debet, cui tantus ac talis uir, iam patriae penè oppressae, factò quodam diuino celitus contigit, qui eam hactenus obscuram, neq; adeo apud exteras nationes claram, sua excellenti doctrina uirtutq; admirabili, in tantum illustrauit, ut iam nomen suum non ignobile, sed magnificum, non obscurum, sed media luce splendidius in aethera usq; feratur. Accedit ad hanc foelicitatem illustre illud ex generosissima Gyuulayna familia (Dii ita disponentibus) sydus ac iubar, Reuerendiss. Dominus, D. VVolfgangus, almae Ecclesiae Zagrabiensis. Praesul digniss. Qui non secus isthio inter doctiss. uiros (quos ad se tanquam adamus ferrum attrahit) quàm inter lucentia astra igneus Phoebus fulget. Cuius encomia non est mearum uirium in praesentiarum recensere, prius equidem dies & oratio me deficerent, quàm id pro dignitate consequi possem, imò lucem ipsam tenebris obfuscarem: Hic etenim uirtutum suarum uestigia ubiq; impressit, estq; uirtute ipsa clarior, ac proinde omni laude superior. Sed de his satis, laudabilius

lius enim mihi multò uidetur hominem tremoris facundie, et ipsum me ingre-  
nue fatior, hic silere, quàm de tanto Heroa pauca, et eadem frigida dice-  
re. Redeo ad Epistolam tuam Petis ne Oratio, cuius paulò ante memini, diu-  
tius in tenebris lateret, quàm potius eam sub prælum Typographis mitterem:  
Qua in re, cum ob meam erga te obseruantiam, tum dignitatem tantæ Mecæ-  
natis, tibi lubens paruè illamq; hominis doctiss. saturam, stanneis literis  
Calcographo formandam tradidi, nec quicquam Orationi addere uel deme-  
re siui, sed eo ordine, ut transmissa est, euestigio excudi curauì. Idq; cò-  
feci animosius et hilarius, ob præsentiam digniss. Preceptoris mei Magi-  
stri Sebastiani Solidi, Poëtae apud Viennæ. Professoris non pœnitendi.  
Hic siquidem casu interuenit, cùm in officinam Typographicam eam Ora-  
tionem tulissem, quam et ipse diligenter perlegit, dignamq; ut imprimere-  
tur iudicauit. Hosq; subscriptos uersiculos in eadem officina ex tempore edi-  
dit. Tu mi Magister Ioannes, diligentiam nostram, simul ac offi-  
cium boni aequiq; consulito. Vale, et me (ut soles) ama-  
re perge. Datum Viennæ Austriæ ex Musæolo nostro,

Contubernij Heidenhaim, Die decima  
octaua Martij, Anno Domini

1549.

# IN EXCEPTIONEM Præfulis eiusdem

CARMEN

II. Sebastiani Solidi  
Guntiani.

**P**ræfulis aduentu letatur tota per agros  
Tellus, quæ Illyricæ accola potat aquas.  
Vrbs feriata ruit densis Zagrabia portis,  
Letitie & Domino signa dat usq; suo.  
Grandeus solita cum Maiestate Senat us  
Ordine sublongo munera grata gerit.  
Hæc quamuis, Præsul, tua nil prudentia curet.  
Vndiq; subiectas cum modereris opes.  
Seu patriæ præsens secundis uteris aruis,  
Quæ manat liquidis Sauus amœnus aquis.  
Seu tua te DVMBRI delectant mania campis,  
Siue alibi Illyricos complacet ire lacus.  
Sed tamen est aliquid Dominum sic noscere plebem.  
Et reduci famulas adtribuisse manus.  
Grande decus Domini, dominum dum subdita plebes  
Diuinum ueluti numen honorat, amat.  
Que dum per totas narratur fama plateas,  
Et præter solitum iubila læta sonant:  
Mox madidum latis Sauus caput erigit undis  
Suspiciens rara Tympana pulsa manu.  
Suspiat & uaria resonantia carmina uocæ,  
Dum phaleris micos currere sensit equos.  
Ac ubi Pontifici uenienti hæc surgere uidit,  
Quem nuper dominum nouerat esse suum,  
Is quoq; demulcens madidam de pectore barbam,  
Placato tales fundit ab ore sonos:

Hæc

*Hæc meritò sunt, debentur & illa benignæ  
 Heroi, cui nobile scintilla uiget.  
 Quo ducæ perpetuò felix respublica stabit.  
 Stabit & hinc ueteris Relligionis honor.  
 Hunc, Deus oro, Duam serues ad Nestoris annos,  
 Viuet in æternos sic decus omne dies.*

**IN LAVDEM EIVSDEM**  
**Præsulis Epigramma**  
*eadem Autore.*

*Candida progenies, quam Laurus, & Insula uisib.  
 Quicq; tuos morum nomine uincis Auas.  
 Nos tua uirtutum quodam præconia uersu  
 Exilis penitus digere Musa uetat.  
 Sed quia concessum est pueris laudare Tonantem,  
 Est simul illorum laus quoq; grati Deo.  
 Tu sumas solido mentis quod promimus orsus  
 Te uirtus, pietas, tollit ad Astra fides.*

**ALIVD.**

*Virtutum series claros memoranda parentes  
 Euehit, & superis insinuatq; Deis.  
 Hos non ipse tua dico pietate sequaris,  
 Namq; bonus quisquis, quod facis, usq; probat.*

B

Ad

**AD D. PAVLVM**  
**Iureconsultum, & Vicarium Almae**  
**ECCLESIAE ZAGRABIEN. IN**

*eius exceptionem.*

**M. Sebastianus Solilius**  
**Guntianus.**

*Ipsc legens nuper uerbis tua scriptis disertis,  
Paule decus Phœbi, laus utriusq; fori.  
Non potui tantam meritò non tollere uenam,  
Quæ mira ingenij dexteritate fluit,  
Hanc quoq; nemo bonus dicet, quin diuite cultu  
Laudanti dederint, Pallas, Apollo tibi.  
Præfulis hinc quamuis laus sit permagna grauisq;  
Vel quoq; Meonio carmine digna cani.  
Vix tamen Orator potuit tam tersius ullus  
Verborum & rerum lumina tanta sequi.*

**ZAGRABIA LOQVITVR.**

*Illyria, salue Præsul, spes maxima Regni,  
Ingredere & patriæ mœnia nostra pater.  
Te duce, Tempa, Foci, Gentes, Respublica, Musæ,  
Lætius hoc nostro, quàm prius, orbe uirent.  
Vtq; diu uigeant, Pylios te seruet in annos  
Incolumem nobis, qui tenet astra poli.*







Österreichische Nationalbibliothek



+Z167668105



Österreichische Nationalbibliothek



668105

